

萬有文庫

第二集七百種

王雲五主編

大方廣佛華嚴經

(八)

實叉難陀譯

澄觀撰述

商務印書館發行

大方廣佛華嚴經

(八)

實叉難陀譯  
澄觀撰述

國學基本叢書

# 大方廣佛華嚴經疏鈔會本卷十九

卽於衆中承佛威神。觀察十方而說頌曰。

疏今初。勝音文分二。先說偈儀。後正說偈。下十例然。偈中總相讚佛。亦含諸問。思之可知。鈔亦含諸問者。文含四十句。且收十海。初偈卽佛海。次偈演說海。三一偈變化海。一毛示現故。四一偈衆生海。五一偈世界海。六一偈法界安立海。七一偈波羅蜜海。八一偈佛壽量海。已證佛地。必有壽故。九一偈解脫海。普賢開覺。已離障故。已獲神通。作用解脫故。十一偈名號海。身雲普徧。隨物立名故。十海旣爾。攝餘句問。例然。故令思之。

佛身充滿於法界。普現一切衆生前。隨緣赴感。靡不周。而恆處此菩提座。

疏十頌分三。初三直就佛歎。次六約衆歎。佛三有一偈。雙結主伴。初中三偈。皆歎如來體用無礙。於中初一不動本而周徧。則十身圓融。徧四法界。鈔十身圓融者。以但言佛身故通十身。但云法界。故通四界。以體卽理。用卽是事。體用無礙。卽事理無礙。卽一卽徧。卽事事無礙。又初句體徧。次句明用。第三句明用徧。第四句不動本也。本有二種。一眞身爲本。本體自徧。以用如體。故不動本而普徧。二應用之中。自有本末。菩提座身卽本。周十方卽末。故下不起樹王而昇四天。正明不動本而周徧。今明雖徧法界。而處此座。明不壞末而歸本。此二不相離故。疏以不動本而周徧。釋不壞徧而歸本。如來一一毛孔中。一一刹塵諸佛坐。菩薩衆會共圍繞。演說普賢之勝行。

如來安處菩提座。一毛示現多刹海。一一毛現悉亦然。如是普周於法界。

疏後二、不壞小相而廣容。上則事如理故。此則事含理故。於中前一偈半。一毛攝三世間。後半類餘。謂徧法界內。皆有佛身。無有一毛不含刹海。又一毛表解脫門。諸佛菩薩智所住故。現多刹海者。門門皆是淨土因故。鈔上則事如理故者。菩提座身是事。以如理故周徧。此則事含理者。一毛是事。無不包故。由理有二義。一無處不徧。二無法不包。猶如虛空。具包徧義。今事如理。故具上二義。卽事事無礙中。事理融通門也。又一毛者。約觀心釋。一毛內空。能容受故。

一一刹中悉安坐。一切刹土皆周徧。十方菩薩如雲集。莫不成來詣道場。一切刹土微塵數。功德光明菩薩海。普在如來衆會中。乃至法界咸充滿。

疏次六偈。約衆歎者。聖賢輔翼。顯主勝故。六偈總明主伴皆徧。於中初二總身總相徧。

法界微塵諸刹土。一切衆中皆出現。如是分身智境界。普賢行中能建立。一切諸佛衆會中。勝智菩薩僉然坐。各各聽法生歡喜。處處修行無量劫。已入普賢廣大願。各各出生衆佛法。毗盧遮那法海中。修行克證如來地。普賢菩薩所開覺。一切如來同讚喜。已獲諸佛大神通。法界周流無不徧。

疏後四總身徧別中。旣微細難思。故唯普智方知。普行方立。鈔初二總身者。然有四句。謂一總徧總中。二總徧別中。三別徧別中。四別徧總中。然所徧通依正。且約能徧爲正。所徧爲依。依正各有總別。正總卽全身。別卽眼耳。乃至一毛。依總卽全一國土。別卽若樹若石。乃至一塵。初但云刹中安坐。故是總

身總相徧。後明身徧塵中之土。總徧別中。

一切刹土微塵數。常現身雲悉充滿。普爲衆生放大光。各雨法雨稱其心。

疏三、雙結可知。

爾時衆中。復有菩薩摩訶薩。名觀察一切勝法蓮華光慧王。承佛威神。觀察十方而說頌曰。

疏第二十方菩薩讚德。十方卽爲十段。今初東方。言衆中者。大衆海中。前列名處。名觀察勝法蓮華幢。幢相高出。王是超勝。此喻相似。光慧卽是所喻幢體。鈔言衆中者。爲揀昔解。以爲勝音眷屬讚故。則

是勝音衆中菩薩故。今明是新舊大衆海中。

如來甚深智。普入於法界。能隨三世轉。與世爲明導。

疏偈中讚佛。眞應二身。密答佛地。如來智等。攝佛地故。十頌分二。初三讚眞。後七讚應。讚眞必體用雙美。讚應唯約用明。欲顯門差。實非體外。今初也。於中初一讚智身。次一讚法身。後一雙結。智含四智。法卽法界。五法具矣。智中上半正體證眞。下半後起隨俗。又句各一智。初句大圓鏡智。行相深細故。次句平等性智。自他平等。卽法界故。次頌妙觀察智。於自共相無礙轉故。末句成所作智。成就利他導世事故。鈔又句各一智者。上約二智。此約四智。四智之相。已見第一經。今但取其與今經文相應之處引之耳。

諸佛同法身。無依無差別。隨諸衆生意。令見佛色形。

疏二、讚法身中。上半體相皆同。同有二義。一本性法身體同。言無依者。無住本故。無差別者。體無二故。

二、已證法身相同。力無畏等。皆無畏故。此則無礙慧身。不依一切。離諸分別。是無差別。鈔力無畏等者。卽問明品文。經云。文殊法常爾。法王唯一法。一切無礙人。一道出生死。一切諸佛身。同共一法身。一心一智慧。力無畏亦然。言相同者。卽相似名同。非謂共也。此則無礙者。上以無住本釋無依。無依是理。故無住卽實相之異名。今以智慧釋無依。故出現品云。一切佛法依慈悲。慈悲復依方便立。方便依智。智依慧。無礙慧身無所依。離諸分別者。上釋無差別。約理無二。今釋無差。但心無分別耳。故無差別。與無分別。有通有局。局則無差別。是理無分別。約智通則理亦得名無分別。故問明品云。佛刹無分別。無憎亦無愛。智亦得名無有差別。謂無差別智爲能證。故今用通義。以無分別釋無差別。

疏下半用同。能現能生。身土智影。皆無二故。卽法身無色。應物現形。鈔能現能生。身土智影。皆無二故者。卽唯識大圓鏡智之能。亦如上引。卽法身者。引證此語。正是肇論論云。法身無色。應物現形。般若無知。對緣而照。若取本據。卽是經云。佛身法身。猶若虛空。應物現形。如水中月。下經亦云。佛以法爲身。清淨如虛空。所現衆色。形令入此法中。

具足一切智。徧知一切法。一切國土中。一切無不現。

疏三、雙結者。上半結智。上句根本。下句後得。下半結法。但舉其用。體通上下。以智契如故。金光明說。如。如及如。如智爲法身故。鈔以智契如下。會上二身。令無障礙。是真法身。引金光明。已如上引。卽三身品。

佛身及光明。色相不思議。衆生信樂者。隨應悉令見。

疏後七讚應分三。初一隨樂現應。不思議者。隨緣無邊故。光明覺云。億那由劫共思量。色相威德轉無邊等。

於一佛身上。化爲無量佛。雷音徧衆刹。演法深如海。

疏次四。身光演法。初一化身演法。望前應身。卽重化也。鈔望前應身者。應身對法報。應是化身。今

於應身上起化。故云重化。如釋迦是應身。涅槃受供。於其毛端現多化佛。卽重化也。

一一毛孔中。光網徧十方。演佛妙音聲。調彼難調者。

如來光明中。常出深妙音。讚佛功德海。及菩薩所行。

疏次二。毛光演法。

佛轉正法輪。無量無有邊。所說法無等。淺智不能測。

疏後一。結歎難量法輪義如別說。

一切世界中。現身成正覺。各各起神變。法界悉充滿。

如來一身。現佛等衆生。一切微塵刹。普現神通力。

疏後二。偈成道起通。上皆圓融。亦有十身。且從一義耳。

爾時衆中。復有菩薩摩訶薩。名法喜慧光明。承佛威神。觀察十方。而說頌曰。

疏第二。南方法喜菩薩。前雲集中。名普照法海。慧會義亦同。光明卽照法故。十頌歎佛寂用。應機德。答前境界。法身顯現。卽分齊境。無生無體。卽所觀境。衆生國土。皆所化境。

佛身常顯現。法界悉充滿。恆演廣大音。普震十方國。

疏於中分三。初四依眞起應。於中分二。先一顯眞。佛身常者。第一義常。出三世故。智符於理。湛然常照。顯者離二障故。現者常在前故。不同衆生。自體常也。鈔初一偈顯眞者。此約法報無礙之身爲眞佛也。第一義常者。本有常也。智符於理。湛然常照者。修成合本有也。若依法相。後常是相續常。今依法性宗。冥符於理。同理常也。故生公涅槃疏云。夫眞理自然。悟亦冥符。眞卽無差。悟豈容易。不易之體。爲湛然常照。卽其義也。顯者離二障者。亦有二意。若別說者。離煩惱障。故法身顯。離所知障。故智身成。合則二障俱障。二身離於二障。俱顯二身。智性本有。非照今有。

疏法界悉充滿者。諸根相好。一一無邊。無限福智所莊嚴故。鈔諸根相好。一一無邊者。卽自受用身。果無限福智所莊嚴者。卽自受用因。故唯識云。二受用身。此有二種。一自受用。謂諸如來。三無數劫。修集無量福慧資糧。所起無邊眞實功德。及極圓淨常徧色身。相續湛然。盡未來際。恆自受用廣大法樂。釋曰。以論對疏。居然可知。

疏次二句。音恆用普。恆自受用廣大法樂故。

如來普現身。徧入於世間。隨衆生樂欲。顯示神通力。佛隨衆生心。普現於其前。衆生所見者。皆是佛神力。光明無有邊。說法亦無量。佛子隨其智。能入能觀察。

疏下三偈起用。初一普隨物樂。次一感應道交。後一法光無際。鈔初一普隨物樂下。三義皆通他受用身。及變化身故。唯識云。二他受用。謂諸如來。由平等智。示現微妙淨功德身。居純淨土。爲住十地諸



菩薩衆現大神通。轉正法輪。決衆疑網。令彼受用大乘法樂。

佛身無有生。而能示出生。法性如虛空。諸佛於中住。無住亦無去。處處皆見佛。光明靡不周。名稱悉遠聞。無體無住處。亦無生可得。無相亦無形。所現皆如影。

疏二有三偈。體用無礙於中。初二句約相。無生現生。次二句約性。無住而住。次一偈約用。無去住而普周。後偈體用雙拂。謂無體拂上無生。無生爲佛法體故。今體卽非體。鈔無生爲佛法體者。諸經論中皆詮無生之理。故淨名不二。發始明之。楞伽經說一切不生。中論不生爲論宗體。傅大士亦云。佛法以無生爲體。無著爲宗。忘相爲因。涅槃爲果。諸文非一。

疏無住處者。拂約性二句。亦無生可得。拂示生句。下半拂前第二偈約用。用如影故。鈔無住處者。拂約性二句者。以約性云。法性如虛空。諸佛於中住。似有住處。今謂法性如空。則無所住。況體無生。安有能住。不住諸法。方住法性。故上文云。諸佛於中住。金剛經云。應無所住而生其心。若心有住。則爲非住。小品云。若住一切法。不住般若波羅蜜。不住一切法。方住般若波羅蜜。故大般若會之初。皆先明無住。佛隨衆生心。爲興大法雲。種種方便門。示悟而調伏。一切世界中。見佛坐道場。大衆所圍繞。照耀十方國。一切諸佛身。皆有無盡相。示現雖無量。色相終不盡。

疏三有三偈。明真應無盡。一法雲無盡。二衆會無盡。三身相無盡。無盡相言。兼真身故。終不盡者。全同體故。鈔無盡相言。兼真身故者。一應用無盡。若鏡對萬形。二真體無盡。此復二種。一十蓮華藏之色相。故二。一色相體無窮盡。湛然不變。故經云。如來妙色常安隱。不爲時節劫數遷。大聖曠劫行慈悲。

獲得金剛不壞體。勝鬘云。如來色無盡。智慧亦復然。

爾時衆中。復有菩薩摩訶薩。名香燄光。普明慧。承佛威神。觀察十方。而說頌曰。

疏第三。西方香燄菩薩。前名月光。香燄普莊嚴。此中光卽月光。明慧卽是智慧莊嚴。十頌讚佛身含衆海。卽答加持問。由加能入故。

此會諸菩薩。入佛難思地。一一皆能見一切佛神力。

疏於中前九讚衆海。則佛德可知。後一結德歸佛。前中初一總。餘八別。

智身能徧入一切刹微塵。見身在彼中。普見於諸佛。如影現衆刹。一切如來所。於彼一切中。悉現神通事。普賢諸行願。修治已明潔。能於一切刹。普見佛神變。身住一切處。一切皆平等。智能如是行。入佛之境界。

疏別中二。前四平徧一切。於中初一。智身入刹塵。次一。色身普現用。後二釋成前義。一。普賢行圓故。二。身心平等故。

已證如來智。等照於法界。普入佛毛孔。一切諸刹海。一切佛國土。皆現神通力。示現種種身。及種種名號。能於一念頃。普現諸神變。道場成正覺。及轉妙法輪。一切廣大刹。億劫不思議。菩薩三昧中。一念皆能現。

疏後有四偈。明微細入於毛孔刹中。而作用故。

一切諸佛土。一一諸菩薩。普入於佛身。無邊亦無量。

疏後一結中。非唯一會。一切菩薩。皆入佛身。方爲讚佛。

爾時衆中。復有菩薩摩訶薩。名師子奮迅。慧光明。承佛神威。徧觀十方。而說頌曰。

疏第四。北方菩薩。此同本名。但加慧字。然此十頌。歎佛依體起用。轉大法輪。答前佛行。佛以轉法化生。爲其行故。

毘盧遮那佛。能轉正法輪。法界諸國土。如雲悉周徧。

疏文中分三。初二句總。次半偈。并後八偈。共八偈半別。後一偈結。

十方中所有。諸大世界海。佛神通願力。處處轉法輪。一切諸刹土。廣大衆會中。名號各不同。隨應演妙法。如來大威力。普賢願所成。一切國土中。妙音無不至。佛身等刹塵。普雨於法雨。無生無差別。現一切世間。無數諸億劫。一切塵刹中。往昔所行事。妙音咸具演。十方塵國土。光網悉周徧。光中悉有佛。普化諸羣生。佛身無差別。充滿於法界。能令見色身。隨機善調伏。三世一切刹。所有衆道師。種種名號殊。爲說皆令見。

疏別中。讚佛十化。前法界諸國土二句。現受生化。處處受生身。雲徧故。今十方中所有等一偈。讚神通化。末句雖云轉法。意在通用。三有三句。讚業果化。一切諸刹名號不同者。示同趣類業報名。字故。上三依身四。隨應演妙法者。卽辨揚化。隨應則能斷彼疑故。五一偈。勸讚勵化。妙音讚勵故。六一偈。慶慰化。普雨法雨。令彼進修無生法故。上三語業。七有一偈。領受意化。領問受取。演昔行故。八有一偈。決擇意化。決擇有情心行差別。及揀諸法性相不同。方能普化故。九一偈。發起意化。發起宿善及三乘大行。爲

善調故。十有一偈。造作意化。建立佛法事義。種種皆令見故。依實起用。卽是化身。故說化身無別心色。此之十化。與佛地經次第無違。但令相融。不違經旨。鈔十化者。卽佛地經說。佛身有十化。初依身輪起三種化。一受生化。謂受最後身。二神通化。謂諸變等。三業果化。謂受金鏘等。次依語輪起三種化。一辨揚化。謂轉法輪斷疑答難。二讚勵化。謂讚勝勸學。三慶慰化。謂有進修。或能斷證。隨喜慶慰。意化有四。一領受意化。謂領問受取等。二決擇意化。謂觀有情心行差別。揀擇諸法性相不同。三發起意化。謂能發起宿世善根。及令二乘發大行等。四造作意化。謂能建立諸法事義。是故當知依實起用。卽是化身。故說化身無別心色。釋曰。上卽論文。疏文具用。欲會釋經。少有添減。但觀向引。自分疏中主客之言。過未及現在。一切諸如來。所轉妙法輪。此會皆得聞。

疏末後一偈。結歸斯會可知。

爾時衆中。復有菩薩摩訶薩。名法海慧功德藏。承佛威神。觀察十方。而說頌曰。

疏第五。東北方。法海菩薩。前衆集中。名最勝。光明燈。無盡功德藏。法海可當最勝。光明義與慧同。功德藏。名前後無別。無盡二字。前有後無。十頌讚佛攝勝眷屬。答佛力問。寄讚菩薩。實由佛力。故結云。住力地中。

此會諸佛子。善修衆智慧。斯人已能入。如是方便門。

疏文中。初一智滿得法。卽爲總相。如是方便門者。此有二意。一指前。謂具前三輪之化。故能周徧。一國土。二卽下九別。爲如是方便也。

一國土中普演廣大音。說佛所行處。周聞十方刹。疏餘九別相。共讚七事。一讚普演大音。有三種大。一者處大。一一國故。二者義大。說佛行故。三者體大。周聞十方故。

一。一心念中。普觀一切法。安住真如地。了達諸法海。疏二。讚時無空過。念念觀法。證真實故。

一。佛身中。億劫不思議。修習波羅蜜。及嚴淨國土。疏三。能入勝處。諸佛身中。修淨國故。

一。微塵中。能證一切法。如是無所礙。周行十方國。疏四。於染無礙。塵中證法。而周行故。

一。佛刹中。往詣悉無餘。見佛神通力。入佛所行處。疏五。能入佛境。見佛神力。入行處。故行處有二。一智行處。謂十力境。二佛化處。謂器及衆生。

諸佛廣大音。法界靡不聞。菩薩能了知。善入音聲海。疏六。有三頌。善入音聲。初入大音。

劫海演妙音。其聲等無別。智周三世者。入彼音聲地。疏次入妙音。

衆生所有音。及佛自在聲。獲得音聲智。一切皆能了。

疏後入一切音。

從地而得地。住於力地中。億劫勤修行。所獲法如是。

疏七一頌善知諸地。言從地者。卽出心也。而得地者。卽住入也。力地中者。卽佛地也。所獲法者。結上方便也。

爾時衆中。復有菩薩摩訶薩。名慧燈普明。承佛威神。觀察十方。而說頌曰。

疏第六。東南方慧燈菩薩。名全同前十頌讚諸菩薩。悟入深廣。由三昧力。見佛三昧。卽答三昧問也。

一切諸如來。遠離於衆相。若能知是法。乃見世導師。  
菩薩三昧中。慧光普明了。能知一切佛自在之體性。

疏於中分四。初二歎見佛真體。一見佛離相。二見佛自在。言離衆相者。般若云。離一切諸相。則名諸佛。

慈氏論云。但離四相。卽離一切。謂名義自性。及差別也。言自在者。由菩薩定慧雙運。故見佛自在也。

鈔離一切諸相。則名諸佛者。復有文云。若見諸相非相。則見如來。慈氏論者。引此釋上離一切言。故四

加行位菩薩。但觀此四。四者一名二義。三名義自性。四名義差別。名卽能詮。義爲所詮。名中有句。名詮

自性。句詮差別。則名中有自性差別。義中亦有自性差別。能詮所詮。此二相異。故二別觀。若名義自性

名義差別。二二相同。故合觀察。謂觀於名。必詮自性。若觀於句。必詮差別。故自性名。與自性義。此二相

同名義差別。相同亦爾。

見佛真實體。則悟甚深法。普觀於法界。隨願而受身。從於福海生。安住於智地。觀察一切法。修行最勝。

道。一切佛刹中。一切如來所。如是徧法界。悉見真實體。十方廣大刹。億劫勤修行。能遊正徧知。一切諸法海。

疏次四頌明悟法。一證深理法。願力而現。二悟多行法。福智成形。三達果法。體無不徧。四了教法。深廣難知。

唯一堅密身。一切塵中見。無生亦無相。普現於諸國。隨諸衆生心。普現於其前。種種示調伏。速令向佛道。

疏三有二頌。歎身業普應。一深二廣。云堅密者。齊佛體用。堅卽金剛之身。密謂三密之一。卽一而多。故徧一切。卽大而小。故現塵中。無功之應。故無相而現。若約法門。此身卽如來藏性也。不可破壞。故堅深。而難見。故密。衆生塵心。無不皆具。本自有之。故曰無生。體絕百非。故曰無相。衆生六根。是謂諸國。以佛威神。故出現諸菩薩。佛力所加持。普見諸如來。一切衆導師。無量威神力。開悟諸菩薩。法界悉周徧。

疏四。後二頌。歎得佛加持。一此佛力。二餘佛力。

爾時衆中。復有菩薩摩訶薩。名華燄髻。普明智。承佛威神。觀察十方。而說頌曰。

疏第七。西南方。前列名處。云普華嚴髻。少同多異。十頌歎佛攝生自在德。答前自在問。一切國土中。普演微妙音。稱揚佛功德。法界悉充滿。佛以法爲身。清淨如虛空。所現衆色形。令入此法中。

疏文分爲三。初六攝生無遺。次二寂用無礙。後二大用無涯。今初文二。初二能攝。謂身語深廣。前偈語後偈身。身中上半體。客塵不染。故下半用。隨物見異。故亦是釋疑。爲物現相。不乖如空。鈔亦是釋疑者。疑云。旣以法爲佛身。清淨如虛空。何緣現金色等。云何令人悟於虛空。答有三意。一體雖無相。爲物現相。物宜見。故隨他意耳。二若不見相。云何令人悟於無相。如不言。豈顯無言之理。上二意卽爲物現相。句中通之。三如虛空言。取其清淨無相。非離相求。相卽無相。故不乖空。故下經云。佛住甚深眞法性。寂滅無相同虛空。而於第一實義中。示現種種所行事。所行利益衆生事。皆因法性而得有。相與無相無差別。入於究竟皆無相。故不乖無相。相卽無相耳。

若有深信喜。及爲佛攝受。當知如是人。能生了佛智。

疏後四偈所攝。初偈何人能了。內信外攝者。

諸有少智者。不能知此法。慧眼清淨人。於此乃能見。

疏次偈。以何眼見。唯勝非劣。

以佛威神力。觀察一切法。入住及出時。所見皆明了。

疏次偈。了見何法。謂一切法。地地三心。鈔地地三心者。卽入住出。下當廣說。

一切諸法中。法門無有邊。成就一切智。入於深法海。

疏後偈。何位究竟。菩薩地盡。至入佛海。

安住佛國土。出興一切處。無去亦無來。諸佛法如是。



一切衆生海。佛身如影現。隨其解差別。如是見導師。

疏次二、寂用無礙中。初偈用徧出。與體無來往。後偈即用恆寂。隨解自差。

一切毛孔中。各各現神通。修行普賢願。清淨者能見。

佛以一身處。處處轉法輪。法界悉周徧。思議莫能及。

疏後二、大用無涯者。初一一毛。皆普現通。後一一身。各徧轉法。

爾時衆中。復有菩薩摩訶薩。名威德慧無盡光。承佛威神。觀察十方。而說頌曰。

疏第八、西北方菩薩。前名無盡光。摩尼王。此云威德慧。卽摩尼王。法喻異耳。十頌歎佛出現說法。皆周

徧德。答無畏問。說法無畏故。

一一佛剎中。處處坐道場。衆會共圍繞。魔軍悉摧伏。

佛身放光明。徧滿於十方。隨應而示現。色相非一種。

疏於中分三。初二總顯身光徧應。次七辨其所作。後一結用歸本。

一一微塵內。光明悉充滿。普見十方土。種種各差別。十方諸刹海。種種無量刹。悉平坦清淨。帝青寶所

成。或覆或傍住。或似蓮華合。或圓或四方。種種衆形相。

疏辨所作中分二。初二、明光照無遺。

法界諸刹土。周行無所礙。一切衆會中。常轉妙法輪。佛身不思議。國土悉在中。於其一切處。導世演真

法。所轉妙法輪。法性無差別。依於一實理。演說諸法相。佛以圓滿音。闡明真實理。隨其解差別。現無